



partii naleraq

Nuuk 10. oktober 2018  
Hans Enoksen Partii Naleraq

**Siusinaartumik pensionisiat pillugit Inatsisartut inatsisaata allanngortinneqarneranik  
Inatsisartut inatsisaat nr. xx, xx. xxx. 2018-imeersoq**  
(Isumaginninnermut Inatsisinillu Atuutsitsinnermut Naalakkersuisoq)

**Siullermeernera**

Siusinaartumik pensionisiat pillugit inatsisartut inatsisaata allanngortinneqarnissaanik siunnersuut pillugu saqqummiusaaq oqaaseqarfigissavarput.

Siusinnaartumik soraarnerussutisiat pillugit inatsimmik naleqqusaanissaaq uani eqqartorneqarpoq, aammalu ilaatigut kingullermik allannguinnermi kukkusimanerit aaqqinneqarnissaat saqqummiuneqarluni.

Uuma siuliani inunnut pineqartunut inatsisikkut kukkunerit inunnut pineqartunut qanoq sunniuteqarpat? Tassani aappaasup isertitai tunngavigalugit tunniunneqartussat angissusilerneqartartussanngorlugit kukkunikkut aaqqiisoqarsimammat.

Tassani kukkusimanerit inunnut pineqartunut aaqqinneqarsimanersut paaserusunnarpoq. Imaluunniit immikkut akuersinikkut allatut aaqqissoqarsimanersooq.

Sumiiffiit ilaanni ilaatigut eqqorpallaanngitsumik sullissinerit malunnartut oqaatigineqartarput, pingaartumik kommunit anngaasaqarnikkut qanoq inissisimanersut apeqputaasarluni. Pissutsit tamakku ilungersunartutut isigigaagut inuit ikiorserneqarnissaminnik saaffiginnikkaluartut ilaatigut inortorujussuarnik ikiorsiiffigineqartarsimasut assut akuersaaruminaatsikkatsiigit, tassami aningaasat tigusartagaat ilaatigut annikilluinnaraluartut soorlu kissarsuutit aserorpata ikiorneqarsinnaanerit periarfissaqartinneqarneq ajorsimammat.

Tassa kommunit namminneq inatsisilorsinnaanngillat inatsisartut inatsisaat malinneqartussaapput, imaanngitsoq kommunip karsia kisiat isigalugu aaqqiiffiginiarneqartassasut, inuimmi inatsisikkut illersugaanerit aallaviusaaq kommunip paasinninnerat kisiat aallaaviginagu.

Taavalu una paaserusupparput qanoq paasineqassanersooq tassalu § 29 immikkoortoq 2. ”Kalaallit nunaata avataanut angalanermut ataasiannarluni ikiorsiissutinik tunniussisoqarsinnaanngilaq” taanna oqaasertaa qanoq paasisariaqarpa? Tassa arlaleriarluniluunniit akiliussisoqarsinnaasooq? Oqaasertaa tunngavigalugu uagut taamatut paasivarput. Tamanna ilumoorpaa? Taavalu qallunaatuani aamma oqaasertai allaallutik tassani akiliunneqarsinnaanngitsumik oqaasertaqarluni.

Sinerissamut akit naapertuuttut tunngavigalugit siusinaartumik pissartagalik akiliunneqarsinnaasooq inatsimmi oqaatigineqarpoq. Kisiannili tassa assersuutigalugu siusinnaartumik soraarnerussutisialik

assersuut, meeqqaminik danmarkimi napparsimasumik, imaluunniit toqukkut qimagaanermi naammattoorsigaanni, taava akiliunneqarsinnaanngitsoq inatsimmi oqaatigineqarpoq. Oqaasertap taassuma eqqarsaatigineqarnissaa kaammattuutigaarput, nutaamik oqaasertaliilluni ikkunneqarnissaa kissaatigaarput. Tassalu immikkut akuersilluni akiliunneqarsinnaanerat periarfissaasariaqartoq.

Taamatut oqaaseqarluta ataatsimiitiliami suliarineqarnissaa innersuussutigaarput.